

安徽古籍叢書

龍眠風雅全編

〔清〕潘江輯 彭君華主編

十

黃山書社

龍眠風雅全編

十

〔清〕潘 江輯 彭君華主編

安徽古籍叢書

黃山書社

第十冊目次

龍眠風雅續集

卷二十六下

劉鴻都(九十二首)……………四五一五

姚文勳(四十五首)……………四五三九

光廷瑛(十三首)……………四五五四

左之柳(十八首)……………四五六〇

卷二十七

寓公

范又蠡(二十九首)……………四五六七

附錄

龍眠風雅序(施閏章)……………四七五一

楊昭雍(二十一首)……………四五七六

程鳳(二十三首)……………四五八二

衲子

釋興斧(二十九首)……………四五八七

釋智操(三十六首)……………四五九六

釋音時(十九首)……………四六〇六

釋照賢(一首)……………四六一三

卷末

潘江(三百四十六首)……………四六一五

龍眠風雅序(毛奇齡).....	四七五二
(道光)續修桐城縣志・潘江.....	四七五四
潘木厓先生傳.....	四七五四
龍眠風雅全編著者索引.....	
龍眠風雅全編篇目索引.....	

龍眠風雅續集卷二十六下

木厓潘 江蜀藻輯

劉鴻都

字爾雅，別號西麓。崇禎末諸生。改革後與里中親朋爲文會，祭酒膠序間。順治甲午，學使者藍公潤考取拔貢，宰晉之廣昌。廣當凋瘵之後，田疇汙萊，君務以德化民，捐俸輸公，墾荒足額，又首倡義學，分俸濟貧，不以鉅筭售奸，不以析楊植威，疊膺紀錄者五。去之日，樹珉道左，鐫有劉公實錄，至今庚桑弗輟。里居步履間巷間，無貴倨之色，遇橫逆，一以情恕理遣，里中大家右姓咸稱其謙和退讓爲不可及，至訓誡子弟，奉爲挈令。年七十有八，考終于家。君文名籍甚，髫與張子如三、齊子古愚爲竹林之會，繼偕其同學與吾黨共樹旗鼓，文壇細柳營也。歿後，予爲之私謚曰端惠先生，蓋實錄也。詩不多作，廬存其什二以表崖略。

寄懷倪涵谷孝廉

昔年曾記客京華，同寓天壇羽士家。猶念授經懸馬帳，遂因薄宦散天涯。喜君新拜夕郎職，憐我久看故國花。惆悵春明還有夢，依依廿度雁飛斜。

甲辰春仲旅寓燕臺喜晤藍寅庵世兄得悉夫子東山近況甚慰隨蒙以農舍旺山記事諸篇見示依韻敬和聊志景仰

東莊農舍

宿繫舟霖望，東山樂泳游。鳳毛傳藻翰，豹尾壯弓裘。陶秫釀新酒，裴堂集舊遊。聖朝資碩輔，還有璧輪求。

旺山亭

攜客登亭上，微風不掩關。恩知赤舄重，情戀白雲間。芝秀千年澤，松高百歲顏。碩人舒嘯處，皎月滿東山。

藍學臺夫子輓詞

木天清署紫微郎，誰料花磚日影荒。名節應教千古壽，文章寧比六朝香。可知鐵網存江上，曾記冰壺照法堂。從此靈光秋夜隕，愁看東海月中霜。

廣署感賦

萬里浮家到此間，一官勃窣老塵顏。飽看倒馬關頭月，遍歷飛狐塞外山。歲儉苦多鹽米累，鄉遙時覺信音艱。何由解綬霑微祿，半畝松筠鎮日閒？

贈倪涵谷

聽鷄午夜共披帷，薊北風煙寄所思。別緒幾看芳草處，逢君恰值杏花時。臺誇燕市黃金麗，賦比長楊白鳳奇。經術兒寬原博雅，姓名應許對龍墀。

乙卯孟冬六日同蜀藻以贊如三子周喈公集越樓山閣望紅葉拈楓字

何必雲深處，登臨好看楓。偶陪六逸後，初許一尊同。坐見秋山色，飛來小閣中。鉤簾眺

平楚，非愛夕陽紅。

方太史密之元配潘夫人七十

十月天高秋已暮，菊英燦燦香晚吐。稱觴此日快登堂，南極星輝明寶婺。當時爭式碩人儀，河陽閨訓勤姆傅。太史聲華振鳳池，獨留忠孝抒真慤。一朝冠蓋敞屣輕，卅年操作同荆布。丸熊深識北堂賢，教成晝荻經幾度。名士風流屬謝庭，參天蓊鬱皆瓊樹。即今詞藻重鷄壇，他年早卜天衢步。會見褒美列黃麻，千秋爲詠岡陵句。

送陳藥菴同年之任瀘州

同譜情親三十年，如今仍著祖生鞭。使君叱馭春風起，刺史隨車暮雨懸。灩澦輕舟聽擊楫，郛筒美酒助鳴絃。河橋綠柳欣相送，瀘水剛逢五月天。

贈余郇長郡丞同年

遙遙華胄舊馳聲，青綬承恩出帝京。歷仕久知培世澤，著名今又見專城。行看蘇雨千門偏，佇聽權謠五袴成。盛代循良推第一，誰云江漢少澄清？

上已修禊同集子周龍眠山莊拈山天二字

舊鍊三都地，捫蘿許共攀。酒行叢竹裏，人坐綠陰間。地曠容栽樹，牆低縱看山。流觴何處好？更過碧溪灣。

草滿榆煙路，茶香穀雨天。雲深時入戶，園小不妨田。山徑千竿綠，僧寮一樹然。僧房尚存絳桃一樹未殘。盤餐勞遠致，已覺日如年。

答渾源鄧宗原

塞外荒城絕雁魚，不圖染翰忽飛余。尊前笑語相逢久，山下馳驅又待初。誰似風流忘淡泊，那能軼掌事詩書？請看使至貽佳筵，筆墨餘光摩詰如。

丙辰上元後一日同集張如三勺園看梅拈得芳字

似惜笙歌鬧，巡檐可侑觴。到來非一樹，早已綻羣芳。不夜非關月，無風時有香。辟疆花事好，還欲賞姚黃。

白鴉紀瑞詩爲余郡丞賦

爛熳一城花，高飛見白鴉。佇看棲柏府，先與集冰衙。皎皎心何潔，嘈嘈語未譁。野人還獻瑞，幾歲足桑麻。

龍門十二景

選十

石門

疊疊千峯去復回，天留一逕石門開。縱橫不屑容車馬，應爲幽人獨往來。

丹青峽

爭將綵筆染丹青，畫出層巒到紙屏。安得畫圖如怪斧，天然益信有山靈。

天方池

蕩漾天然別有池，池生坡側覺幽奇。波光可是菩提水，歲歲慈航渡者誰？

雨珠崖

蒼崖滴翠水如珠，山際空濛色有無。豈是夜光堪照乘，移來萬顆滴山隅？

白龍潭

峯頭清澈白龍潭，潭底滄浪影淡涵。莫有煙雲時出岫，在天霖雨偏東南。

元圭石

雲根如劍亦如圭，瘦骨嶙峋草色迷。誰使禹功分錫後，頓教風雨立山蹊？

古藤洞

盤旋山勢信幽棲，山本空來洞自宜。折得古藤爲一杖，好隨洞口徧探奇。

羅漢峯

羅漢峯高立寺西，環看四面衆山齊。誰令得道阿羅漢，五百離羣獨此棲？

獅子峯

古佛曾名獅子吼，峯頭高處亦同名。春來筇杖相尋去，鐘磬聲聲別有情。

瀑布

諸峯萬仞勢縱橫，夾道飛泉日夜聲。一任潺湲流不盡，禪心不擾夢魂清。

程松皋招集北郭分賦

倚壑晴張幔，招攜水一涯。開樽臨怪石，分韻坐平沙。春老鶯吭滑，巖高野色斜。坡仙題

詠處，古壁長藤花。

不是山陰道，臨風亦汎觴。酒溫寒食過，風靜落花香。石罅雲根白，春疇麥穗黃。徜徉歸去晚，山色淡斜陽。

詠天竹

蕭蕭瘦影比琅玕，青碧多從禁苑看。朱實縱多難引鳳，翠枝雖滿不棲鸞。伶倫漫想裁龍笛，漁父休思截釣竿。密葉枯藤還耐冷，歷殘霜雪未知寒。

小滿後二日同集以贊息心亭看竹拈新端二字

花事闌珊後，方知久別春。衣沾梅雨潤，酒過麥秋醇。筍覺初看好，亭因改徑新。主賓渾莫辨，總是竹林人。

翠竹抽梢易，芳時聚首難。恰逢新雨露，仍長舊琅玕。怪石留人拜，藏書與客看。醉歸那用燭？明月逗林端。

戊午菊月滌岑自雲間歸子周續舉花會于橘亭看菊拈天影二字

里中真率飲，疏闊動經年。歎息人事異，隨時各變遷。萍踪自聚散，月魄有虧圓。柳水泛一葉，久客返龍眠。左慈續前約，丹楓九月天。舉杯失孫楚，使我心淒然。還念張仲蔚，一官冷青氈。掀髯風雅伯，高談驚四筵。移尊就花下，莫惜沽十千。不見高陽侶，曠達至今傳。

取逕何逶迤，橘亭固幽境。金粟間芙蓉〔一〕，閉門秋色靜。猶有傲霜花，挺挺橫素梗。徘徊把玩間，永日直俄頃。猶恐不盡懽，夜遊燭可秉。虛檐蟋蟀鳴，耐此清露冷。起視銀漢高，天際流淡影。

陽月望前二日滌岑重舉壽讌邀同諸子看菊拈須就二字

高會良可續，花時聊足娛。壺觴佐風雅，吾道庶不孤。主人雲間還，折簡邀吾徒。耆英傳洛下，何復禮法拘？賦詩爭獻壽，燦燦雙明珠。我亦索枯腸，小言媿蹢躅。酣飲願爲樂，醉仍把茱萸。籬花猶騁豔，天意若爲須。

酌酒問花神，所憐花影瘦。把玩未移時，暗香盈我袖。霜雪任交加，亭亭獨挺秀。回首當春陽，衆卉俱暢茂。誰爲振孤芳？零落初冬候。乃知晚節堅，天地亦成就。眷言懷德音，采采爲君壽。

季春望前二日同集啾公片野看牡丹拈溪圖二字

天香那易得？君獨種成畦。蝶趁將殘採，鶯爭選豔啼。色疑經雨淡，顏欲向人低。祇恐衰紅謝，春流落滿溪。

終朝城市裏，不信報春徂。是事逢花撇，浮名到酒無。隔林來梵唄，穿竹見行廚。他日耆英會，誰將入畫圖？

贈別胡簡士明府

山城何幸借高賢，竹馬初來製錦偏。百里桑麻開夜戶，千家燈火接朝煙。趙公依舊攜孤鶴，劉寵何曾受一錢？自古陽城多下考，歸來贏得抱琴眠。

壽潘伯母吳太夫人

六袞尋常事，夫人德範全。河陽名倍重，梅里族尤賢。列女應同史，麻姑本是仙。板輿看膝下，玉樹與雲連。

拜母當茲日，鷄窗念載情。汎舟歌令節，剗薦著賢聲。永日詩兼畫，長年鶴與笙。綺筵將進酒，金粟泛秋英。

霜降楓葉不紅

出郭尋秋石徑斜，楓陰深處懶停車。驚看霜罩千章碧，難說紅于二月花。造化何須工點綴？山林原不重繁華。但憐詩句憑誰寄，從此深宮怨更賒。

社後燕不辭巢

頻到茅堂覓舊棲，相親最愛羽差池。但教來日還宜早，誰訂歸期未許遲。縱可依依終是客，卻疑去去不知時。年年村鼓秋聲裏，似爲梁間促別離。

秋山杜鵑花

風霜蕭索莫秋天，一片流霞綻欲然。未聽鳥聲來枕上，何緣春色到崖前？重教豔處朱顏老，開不逢時造物偏。應是枝頭留舊恨，荒林衰草亦相憐。

遲月看芙蓉影

拒霜花傍小橋東，不盡徘徊此夜中。失記容顏徒想像，欲窺深淺待瞳朧。幾叢弱態移時出，一片微陰著意籠。寄語嫦娥休見妬，早教嫋娜媚簾櫳。

篝燈聞蟋蟀聲

燈影風搖寒氣侵，耳邊唧唧更蕭森。可憐緘口猶多語，似惜流光費苦吟。底事在牀悲至此，入秋伴我到于今。祇教感憤存天壤，踪迹深藏不可尋。

夢回聽野寺霜鐘

纔向邯鄲枕上還，清音何處動禪關？偏于寒漏將殘候，頻喚迷途半醒間。入耳豈同霜杵